

李文忠公奏稿

李文忠公奏稿

卷之二目錄

逆匪復倡滬防摺

同治元年八月初二日

洋將添造上海礮臺經費片

同治元年八月初二日

北新涇解圍摺

同治元年八月初七日

湖州降賊之千總熊得勝軍前正法片

同治元年八月初七日

協解袁甲三軍餉片

同治元年八月三十日

上海已革副將馮日坤正法摺

同治元年八月三十日

華爾陣亡請卹摺

同治元年閏八月初六日

松滬近日軍情摺

同治元年閏八月二十三日

水師蘆墟勝仗片

同治元年閏八月二十三日

請飭多隆阿回援金陵摺

同治元年閏八月二十四日

克復嘉定縣城摺

同治元年九月初六日

逆賊圍攻四江口摺

同治元年九月十九日

程學啟不能赴援金陵片

同治元年九月十九日

郭嵩焘請無庸迴避片

同治元年九月十九日

四江口解圍摺

同治元年九月二十八日

覆議江南糧臺歸併江北摺

同治元年十月十九日

克復上虞縣城摺

同治元年十月二十五日

覆奏曾秉忠金鴻保參案摺

同治元年十月二十五日

續徵稅銀請准歸還原借商稅片

同治元年十一月初一日

覆奏近日軍情摺

同治元年十一月十八日

白齊文滋事撤換片

同治元年十一月十八日

奏獎外國官弁片

同治元年十一月十八日

收復常熟昭文攻克福山許浦摺

同治元年十二月初十日

整飭常勝軍片

同治元年十二月初十日

查明淮鹽課釐數目摺

同治元年十二月初十日

勒伯勒東陣亡請卹摺

同治元年十二月十七日

請留英總兵哇藥德克片

同治元年十二月十七日

請優卹曾貞幹摺

同治元年十二月十七日

覆奏添募揚勇片

同治元年十二月二十七日

李文忠公奏稿卷二

全集一之二

桐城吳汝綸編錄

逆匪復倡滬防摺

同治元年八月初二日

奏爲青浦克復後蘇州逆首糾合各路大股來犯復繞竄滬防以圖大逞現在調撥援剿情形恭摺仰祈

聖鑒事竊七月十五日克復青浦業經專摺馳報在案溯自臣到滬後裁汰松滬舊有兵勇暨節次潰散之餘現存不及萬人分防松江寶山與上海之北新涇等處已虞不足臣所部湘淮勇及浦東新收各營除淮揚水師外陸軍亦不過萬餘人現駐金山衛四千餘青浦城內一千五百名分紮北簞山鳳凰山塘橋等處四千人爲青浦後路援應臣上海老營所存不滿三千人署提臣黃翼升親督師船分防青浦泗涇各內河與陸師相爲依護誠以青浦

爲蘇州門戶而金陵攻急賊必全退蘇州恐我滬上一軍由崑山  
長驅而進奪其巢穴故青浦爲賊所必爭非得重兵扼守勢難完  
固該縣甫經克復副將程學啟入城布守卽據謀報僞忠王李秀  
成調蘇崑嘉興等處踞賊十餘萬分爲三大股遣賊目三人統之  
由西北兩路撲犯其西路係僞主將慕王譚姓所帶有眾二萬餘  
十九二十等日直撲青浦西門黃翼升督各船開礮對擊賊旋回  
竄二十五日繞撲北簞山營盤副將滕嗣武通判韓正國堅壁靜  
守乘該逆填橋渡水之際鎗礮環施擊斃執旗賊目數名適水師  
礮船駛抵西南河橋併力轟擊而鳳凰塘橋各營亦整隊來援賊  
勢不支隨卽敗走我軍追勦數里生擒二十餘名賊旣不得進於  
青浦復以大股偪攻北新涇營盤北新涇前接張官渡後達法華  
鎮爲上海西路衝要六月間臣派已革總兵況文榜熊兆周等統

賈州兵常銳勇各營千八百人駐扼該處二十六日況文榜伺賊將至密派弁勇至張官渡埋伏賊之前隊遇伏卽退迨二十七日黎明該逆數千由張官渡過河猛撲我軍關礮力拒殪賊不少副將梁安邦都司周元芳等督隊夾擊鏖戰多時各營火器齊發該逆紛紛敗去仍屯踞左近全無退志二十八日臣派隊往剿玉字春字兩營由中路進志字東字兩營攻城之右熊字垣字兩營攻賊之左賊亦分路蜂擁迎敵都司劉玉林衝入賊隊生擒十餘名斬賊酋二人懸其頭於馬後賊爲披靡劉玉林率數十人追之戰十數合右腿忽中鎗傷暈跌落馬方有才等趕前救護扶上馬者三次馬陷泥淖中賊矛環刺登時陣亡哨官守備熊得春亦歿於陣賊遂分數支壓下各營奮勇抵禦將賊堵回八月初一日各路之賊環撲北新涇營營內糧藥缺乏河道淺狹不能進入賊并繞

越營後擾及法華之西距上海僅十餘里臣營兵力過單暫令副將張遇春等分督隊伍嚴陣於法華左右副將王東華督帶礮船由洋涇浜乘潮駛過曹家渡立毀其浮橋三座兩岸之賊蟻聚蜂屯彌望十餘里重重包裹王東華督軍連開鎗礮左右環擊斃賊數百復揮眾登岸衝殺將至北新涇張遇春亦由陸路派隊來應賊退數里其法華街西之賊經都司苗順清馬隊衝潰天晚仍各收隊回營臣以該逆數大股聚集近郊眾十餘萬圍撲北新涇營我軍分防青浦金山衛均在百里以外存滬僅二三千人久恐難支乃飛調劉銘傳吳建瀛四營由金山衛拔隊回援程學啟滕嗣武韓正國等各帶所部由青浦北崑山分路夾擊又調華爾常勝軍由松江來滬據蘇松太道吳煦稟報華爾常勝並約會英法各兵合力迎擊其北新涇營仍密飭況文榜等鎮靜嚴守俟各路兵勇調



齊卽會合洋兵分路援剿以冀掃蕩賊氛查花翎補用都司劉玉

林自投誠以來屢立戰功感沐再造

殊恩奮勇捐軀洵堪嘉憫九江鎮標儘先把總保升守備熊得春

同時陣歿可否均請

旨敕部從優議卹以慰忠魂所有大股逆匪竄倡滬防分調援剿  
各緣由繕摺馳陳伏乞

皇上聖鑒訓示謹

奏

洋將添造上海礮臺經費片

同治元年八月初二日

再七月初九日據蘇松太道吳煦稟稱六月二十四日准英國提督領事等面稱保守上海須環城建造礮臺前經逐一勘定共計十八處業已分別興工又南門至西門應另作新路一條西門外有一高地爲徐家匯及英界至西門之要路應於西門城內築一堅固泥城以資防衛共需各工程經費銀一萬八千三百餘兩片單開送並繪具礮臺圖形並稱該提督先經函致駐京公使轉致總理衙門查前項礮臺各工雖爲防堵要策第未准先行商定業已逐一開工現據交到繪圖催令速交經費無從與之辨論等語續據稱英國官兵催送礮臺工費甚急已由五月分釐捐款內動撥庫平銀四千二百二十餘兩解送會防公所查收湊付申報前來臣維英法提督從前不時來營會商事件無不擇善而從如派

兵教習以及開馬路挑濠溝等事俱經委婉酌飭照辦惟礮臺一節並未先行商及適承准總理衙門公函內開實有此語現據稱工價每礮臺一座由八十兩至三千兩不等亦無從細與稽核事關沿海州縣添設礮臺開銷經費臣未敢壅於上

聞除將原繪圖形并錄原交清單咨送總理衙門備查外理合附片具陳伏祈

聖鑒訓示謹

奏

北新涇解圍摺

同治元年八月初七日

奏爲官軍分路夾剿大獲全勝立解北新涇之圍旋又會合乘勝  
迫逐敗賊滬防肅清恭摺馳陳仰祈

聖鑒事竊大股逆匪竄圍北新涇營案倡滬防分調援剿各緣由  
經臣於本月初二日奏報在案查僞募王譚主將卽係五月間攻  
陷湖州之賊爲僞忠王李秀成部下著名兇悍忠逆本欲其赴援  
金陵而譚逆請先打上海蓋恐我軍深入躡其後也該逆旣率其  
醜類繞出青浦直撲北新涇營七月二十六日以後屢攻不破復  
添來僞主將蔡姓黃姓兩大股蔓延二三十里連營數十座實不  
下十萬之眾況文榜熊兆周梁安邦等督率弁勇併力抵禦晝夜  
不息賊亦傷亡不少而層層包裹斷後路援兵不能遽達初一  
日賊用稻草填濠我軍火器齊發燃燒稻草並燒死濠中衝鋒悍

賊百餘該逆站立不住我軍乘機出營追殺奪旗幟器械甚多初二日晚賊眾四五萬更番疊撲都司張榮發督勇苦戰被賊洋礮打斷右臂勢甚危險二十八九日以後該營消息卽與上海不通賊眾分股四出焚掠附城西南火光燭天計北新涇營中糧藥將盡萬一失事賊燄愈張滬營且將孤立臣因密商臣弟李鶴章傳諭青浦及北簞山鳳凰山塘橋各營以五成隊留守而各帶五成隊急趨泗涇七寶抄賊之後各營悉聽副將程學啟調度臣親督上海老營七成隊伍與程學啟等約於初三日會戰於北新涇並訓浦東各營分兵星夜來援程學啟等先於初二日五鼓閒道裹糧行抵七寶詎譚逆已派賊佔住該處阻臣營與青浦各營中通之路程學啟遂令於七寶街北橫排五營街南橫排五營未刻譚逆復率大隊二三萬擁至圍之數重猛衝三四次其氣銳甚我軍

壁立不動俟其衝過鎗礮環施斃賊無算賊復死力回撲親兵營  
執旗外委張嘉興楊立誠劉義勝等中鎗倒地通判韓正國搶持  
大旗率眾一擁而進鏖戰三四合韓正國右足被洋鎗子穿透左  
脅右腿均受矛傷猶裹創力戰副將滕嗣武參將郭松林由兩旁  
抄擊賊漸不支復併入別股狂呼猛進守備周盛波都司張樹珊  
遊擊張桂芳率領各哨拚命迎敵程學啟往來督戰該逆大敗四  
路狂奔我軍一齊追殺十餘里生擒四百餘名斬斃及淹斃者約  
三千餘名奪獲旗幟刀矛鎗礮馬匹無數因已昏暮各令收隊紮  
住七寶爲詰朝會剿之計譚逆大股是夜遁回野雞墩與蔡黃逆  
眾仍圍新涇然已一夕數驚懼追兵之卽至矣臣督率各隊於初  
三日已刻行抵虹橋睽見賊眾憑河據壘旗幟如林並於壘之左  
右設伏以待遂急趨前進與程學啟等相遇於北新涇營外隨派

春字熊字垣字等營分三路迎勦該逆以洋礮洋鎗對擊子落如雨勇丁凌長春等奮不顧身晁水而渡中礮陣亡程學啟滕嗣武郭松林已馳入泥文榜等營中各隊復鼓勇爭先盡力轟打踏毀賊營十數座賊皆逃過吳淞江北岸恃有大河阻隔排列不退副將華爾常勝軍在法華援應署提臣黃翼升聞警是日自青浦回滬卽督王東華等水師由吳淞江乘潮進擊與敗賊相持至夜四更後風雨大作礮聲如雷轟斃數百名又踏毀北岸賊營七座賊乃退去初四日我軍撤回譚蔡黃各逆又率眾回撲北新涇適參將劉銘傳三品頂戴吳建瀛帶隊赴援衝至野雞墩戰十數合殺賊無算徐家匯西兵復出隊協勦連開大礮賊卽狂奔初五日追過南翔賊已退向嘉定而去泥防一律肅清此初二三四等日連獲大捷力解北新涇圍之實在情形也臣查偽慕王譚逆糾合

黨眾窺上海計極狡毒二十九初二等日遊氛北抵新聞南  
入漕河涇距滬不過數里臣守營鎮靜密調各路之師倍道來援  
但慮北新涇早晚攻破逆眾乘勢長驅臣營兵力過單殊難楮柱  
仰賴

聖主威福況文榜等苦守七晝夜屹未動搖賊不敢舍之深入而  
程學啟諸將神速赴機奮勇力戰遂擊退悍賊數萬水陸中外各  
軍復合力追剿滬防危而復安實非臣初念所及所有此次異常  
出力之已革補用總兵況文榜係應解皖省交督臣曾國藩訊辦  
之員前在杭州督戰頸受鎗傷至今未愈留滬以來屢經大敵苦  
志堅忍初四日之戰又被賊礮傷左腿子尚未出可否籲懇  
天恩免其查辦留營差遣已革記名總兵貴州定廣協副將熊兆  
周可否開復革職處分仍交軍機處記名遇有總兵缺出儘先提



奏副將梁安邦可否

賞加勇號副將程學啟總兵銜副將王東華可否均以總兵記名  
簡放知府銜候選通判韓正國可否免選本班以同知直隸州遇  
缺卽選兩江卽補都司張樹珊擬保都司儘先守備周盛波可否  
均以遊擊儘先補用以昭激勸之處出自

迦格鴻慈其餘隨同出力員弁兵勇容臣查明擇尤保奏陣亡弁  
勇彙案咨部分別議卹所有官軍分路夾剿大獲全勝立解重圍  
滬防肅清各緣由理合恭摺由驛馳陳伏乞

皇上聖鑒訓示謹  
奏

湖州降賊之千總熊得勝軍前正法片

同治元年八月初七日

再湖州被圍五月有餘糧盡援絕戰守極苦聞係千總熊得勝開門延賊賊始入城正在密飭訪拏聞據湖州在滬紳士稟稱熊得勝係湖南人自湖州被圍該千總卽將城外難民船擄劫一空又城中設有四隅粥局以濟餓民該千總率領兵勇搶去粥米數百石變賣圖利每石索洋錢一百元飢民因而餓死者甚眾三四月間該千總借索米爲名闖入人家弔打倡勒無所不至被倡喪命者有之迫欲罄既盈無可搜括密約迎降滿城並無知覺以致湖州陷陷熊得勝遂受檢點僞職門條有管理洋礮衙字樣七月二十日熊得勝忽由賊中潛來上海洋涇浜必有詭謀請速拏辦等情臣當卽面諭署藩司吳煦密派道事候補州同葛繩孝外委徐爾森等前往搜捕在法國租地界內之客棧獲到轉解來營臣復

令湖人識認無誤似此從逆要犯罪惡滔天未便稍稽顯戮卽於軍前梟示以彰

國法而快人心至統領湖防道員趙景賢尙無下落臣連日督軍攻打僞募王譚主將一股該逆前次圍陷湖州所擄弁勇陸續逃出臣逐細研訊據稱趙景賢被僞忠王囚禁在蘇勸令投降趙景賢矢志求死陽狂謾罵忠逆先加禮貌復加拷掠至手批其頰血流面腫不爲少屈臣推原趙景賢從前死守湖州之心當不肯遽毀名節湖人又謂趙景賢城破被擒實爲熊得勝所賣旁參眾證似尙可信除再查有確據隨時奏報外理合附片陳明伏乞

聖鑒謹

奏

協解袁甲三軍餉片

同治元年八月三十日

再臣於五月間承准

寄諭著李鴻章於江海關稅項下先提兩月餉銀四萬兩趕解袁甲三軍營等因欽此當即恭錄札司欽遵籌解去後茲據兼署藩司吳煦詳稱咸豐八九年按月籌解皖餉銀兩其時蘇省完善每年有徵收地漕錢糧以及關稅釐捐數百萬現在蘇常均爲賊踞松江各屬錢糧蠲緩絲毫無徵且逆氛環伺稅釐短絀自英法各二成賠款按結扣還關稅所得月不過十萬兩內外以後漢九等關自行徵稅收數將更不如前而松滬各防軍餉虧欠纍纍實有自顧不遑之勢惟袁甲三望餉迫切暫於關稅項下分解一萬兩以濟急需以後委難源源接解請奏咨改撥前來臣查袁甲三軍餉支絀倍於他處蘇省果可籌濟何敢稍分畛域無如南岸郡

縣大半淪失上海一隅中外防剿兵勇需費甚鉅又按月協濟鎮江卽不能兼顧皖北昨經臣督飭司道勻解一萬兩又由江海關籌解續撥天長犒賞銀五千兩委赴袁甲三軍營交收巴屬勉顧大局此後無力續解不得不據實陳明伏乞

皇上聖鑒謹附片具奏

上海已革副將馮日坤正法摺

同治元年八月三十日

奏爲查明已革副將馮日坤通賊濟匪擾民吞餉案證確鑿欽遵諭旨一面傳

旨正法一面恭摺奏

聞仰祈

聖鑒事竊

臣國藩欽奉同治元年五月十四日

寄諭有人呈稱上海已革副將馮日坤縱兵通賊各等語江南水陸各軍原爲剿賊而設該省淪陷已久僅存上海及江北一隅若如呈內所稱軍務何由得有起色我兩宮

皇太后覩此情形寢食俱廢卽著該大臣密咨該署撫令其留心訪察如馮日坤果有通賊情事該大臣卽行一面傳旨正法一面奏聞等因欽此臣等又欽奉五月二十日

寄諭詹事殷兆鏞奏臚陳在籍聞見情形請飭整頓一摺江浙地方淪陷帶兵將弁乘亂肆行不法甚有潛謀反側兩端首鼠者舊曾國藩李鴻章嚴密訪查遵照節次寄諭辦理其應行逮問及拿辦者卽應懲治一二巨寇以示懲儆原摺著鈔給閱看等因欽此查摺內開去秋馮日坤兵劫殺吳煦未婚婿九月劉卹膏出師百姓環訴馮兵搶掠婦女經劉卹膏搜獲馮兵幾殺劉卹膏等語又欽奉七月二十日

寄諭有人奏江南水師亟宜整頓一摺據稱馮日坤所募水師多係廢勇桀驁不馴身帶紅巾劫掠行旅與賊往來等語著曾國藩李鴻章查明據實參奏毋稍徇隱並如何設法鈴束嚴加整頓之處阿同商辦毋稍遲緩等因欽此節經臣國藩密咨李鴻章欽遵就近密查嚴辦數月以來軍務緊急仍隨時留心訪察查已革副

將馮日坤係廣東人在江南大營多年金陵之潰蘇常之陷所部  
廣勇投賊甚多嗣由鎮江調赴上海該革將以辦理蘇州內應爲  
名與蘇賊廣東人李紹熙勾通接濟咸豐十一年十一月間密派  
弁勇張有文吳春劉阿榮等由滬販運洋鎗銅帽火藥大小三船  
往蘇至澱山湖被提督曾秉忠守卡礮船盤獲當經前撫臣薛煥  
咨令曾秉忠將所獲人犯正法馮日坤猶不知悔懼據曾秉忠向  
臣鴻章面稱馮日坤仍有販賣接濟蘇賊情事若查問過緊恐倡  
致從賊等語薛煥亦謂從前籌辦內應誤用馮日坤不料其因緣  
爲茲擾害地方深以爲恨臣鴻章前於巡查泖澱湖之便親至松  
江府西門外密訪據居民指稱五月間賊撲松郡馮副將縱勇乘  
亂擄劫百姓受害甚苦臣鴻章又至該革將廣富林營盤面詢帶  
勇遊擊梁世能守備歐陽才等據稱馮副將兵勇二千名從未足



數經領糧餉亦未照數轉發多係侵吞各等語惟馮兵劫殺吳煦未婚壻一節查係傳聞之誤至上年八月間在南橋縱勇搶掠圍殺劉郁膏賴團練救免實有其事然在種種惡跡中已屬輕罪不論先經臣鴻章將馮日坤廣勇二千分別裁遣並咨令曾秉忠節汰各項礮船以爲鈴束整頓之計詎馮日坤畏罪驚疑求曾秉忠代爲告病回籍臣批令來營驗病疊催不到該革將潛至上海洋行藏匿蹤跡詭秘臣密飭署藩司吳煦署臬司劉郁膏勸誘來營該革將於八月二十六日始來營投見當經傳知現有奉

旨查辦事件暫交藩司發上海縣看管詎馮日坤抗不服管闖出縣署一日閒兩次脫逃賄買法國巡捕仍縱歸洋涇浜藏匿當經該關道吳煦飭令上海縣王宗濂董事楊徽猷持夜行執照連夜出城偵尋至老旗昌洋行第三層洋樓將馮日坤扭獲由道馳稟

到臣伏查該革員通賊濟匪擾民吞餉案證確鑿情罪重大且心術姦險變詐莫測滬上密通賊區若容候臣國藩傳

旨再行正法文移往返需時既慮逃逸稽誅且恐另生枝節爲害尤甚卽經臣鴻章於八月二十七日欽遵

諭旨一面傳

旨將該官犯馮日坤卽於軍前正法一面會同臣國藩合詞恭摺

奏聞以仰體

皇太后暨我

皇上整頓軍務之至意伏乞

聖鑒訓示謹

奏

華爾陣亡請卹摺

同治元年閏八月初六日

奏爲浙賊復陷慈谿經副將華爾督兵克復華爾旋即中鎗傷亡甯郡防守喫緊新署道史致諤已入城布置恭摺馳陳仰祈聖鑒事竊甯波官軍會合西兵克復餘姚縣城前經臣附摺陳報在案八月中旬新署甯紹台道史致諤由皖來滬正與臣籌商滬捐濟餉各事宜接據甯波府知府林鈞稟報法國兵與廣艇構釁叛兵勾引髮逆攻撲姚城雖經中外官軍擊退恐該逆更圖旁竄該道隨於二十三日與副將華爾同坐輪船駛往甯郡二十九日接據該署道稟稱探聞賊於本月十九至二十一日接續由杭州渡江蟻聚上虞不下十餘萬勢甚猖獗該道旋即入城接印詎賊匪大股經廣匪勾結先於二十五日寅刻突入慈谿縣城蔓延鄞鎮二縣邊界窺伺甯郡而鎮海爲郡城咽喉與慈谿接壤尤少防

兵飭將王瑩保護商輪船一隻雙枝夾板洋船一隻先扼要口杜其東竄復照會英國總兵分撥輪船會同參將布興有等在大西壩一帶節節防守復商同華爾將駐守姚邑之勇抽調數百名來甯幫同保護又據稱郡城僅有道府親軍四百名廣勇各部潰散之後餘存無幾提標六營兵丁老弱二千餘名本不足恃除派守餘姚及分防各縣外存城亦復有限外國教習洋鎗隊號稱二千餘名聞只一千數百名實數無從稽核處此絕無兵勇之時不得不俯順輿情暫用西兵防守無如賊氛甚惡市肆不通關稅日絀艱窘莫狀諄求臣處撥借餉銀以蘇困涸等語續據蘇松太道吳煦稟稱華爾於抵甯後聞慈谿復失卽於二十六日督帶常勝軍駛至半浦距慈谿二十餘里由陸路策馬進兵是夜卽宿城外之板橋廟二十七日黎明親赴城下周歷閱視指揮兵頭六人率眾

登城該副將在後督隊正用千里鏡窺看賊勢不期賊從城上放鎗適中華爾胸腕子從背出登時暈倒爲隨從通事扶救回船其時派令登城之常勝軍已一擁冒煙直上賊匪紛紛潰敗被我兵斬擒甚眾立將慈谿縣城克復而華爾受傷回船自知不救飛棹回郡因慈谿守兵太單復指調甯之常勝軍二百六十名馳赴防守二十八日華爾傷重殞命等情臣查甯波正值喫緊據史致謬請兵請餉上海屠齒相依誼難膜視已飭勸諭甯屬紳商湊集英洋二萬元紹屬紳商湊集英洋一萬元先後委員馳解接濟復飭吳煦派法思爾得在松江挑選常勝軍鎗礮隊四百五十名仍坐輪船於本月初二日駛往協防英法二國亦派兵船各一隻同往甯郡當可無虞至常勝軍除前調赴甯波由甯應付糧餉外現留松江者據吳煦稟稱共有四千五百餘名向由華爾教練口糧

極重每月需餉不下七萬兩惟華爾新亡一時未便遣散又華爾遺言擬暫交白齊文法思爾得會同管帶查白齊文法思爾得二人自前年雇令攻克松郡時卽在事中日齊文亦經具稟願隸中華奏奉

諭旨先賞四品翎頂嗣以蕭塘戰勝復蒙

恩賞三品頂戴法思爾得亦尙奮勇可暫令會帶等語又據吳煦面稟接英領事麥華陀照會英國提督欲派兵頭接管此軍臣復查常勝一軍先由關道吳煦飭派華爾教練是以前撫臣薛煥奏委該道會同前蘇松糧道楊坊統帶每有調遣皆轉由該道飭遵以符體制今若由西人專管恐未必悉就範圍或改派華官經理又未必兩相浹洽經臣與吳煦再四商議自當仍令該關道吳煦會同楊坊統帶其白齊文法思爾得是否勝任並應否允准英國

派人幫同教練之處由該道妥酌飭遵如白齊文等果忠勇出力自不妨破格獎勵如常勝軍不能如前得力卽將人數口糧酌量裁減亦責成該道秉公核辦該軍仍應聽臣等調度並隨時察酌奏明請

旨定奪再查副將華爾係美國部落紐約人前充該國武弁咸豐十年來遊中土經吳煦雇令管帶印度兵隨攻嘉定太倉并兩次克復松江府城屢攻青浦身先士卒疊受重傷旋因奉

旨撤印度兵華爾赴遁具稟願隸中國臣民吳煦因留令管帶常勝軍協守松江本年正月率五百人破賊十餘萬於松江之迎禧濱天馬山等處以少勝多功績最奇復邀同英法二國兵攻燬高橋蕭塘周浦南橋柘林王家寺龍珠庵等處賊壘據吳煦稟稱本年春前松滬屢瀕於危而能幸轉爲安者華爾之力爲多疊沐

恩施由四品翎頂加三品頂戴副將銜並以副將補用一再傳  
旨褒嘉自臣抵滬受事以來該副將頗遵調遣屢次派令會剿金  
山衛城進攻劉河逆匪所向克捷又奮力克復青浦並有力圖掃  
蕩蘇州賊匪之議似此忠勇性成例以中華驍將洵已出色當行  
得之外國通臣尤屬難能可貴臣已督令吳煦等爲改服中國冠  
裳易棺收殮葬於松江以全其效命  
中朝之志該副將華爾於松江甯波戰功尤著此次攻克慈谿中  
鎗殞命實屬可敬可憫相應

奏懇

天恩敕部從優議卹並於甯波松江兩處建立專祠以慰忠魂除  
咨明總理衙門外所有浙賊復陷慈谿竊伺甯郡新署道史致譁  
入城布置由滬勸集餉銀解濟並副將華爾再復慈谿中鎗傷亡



懇

恩優卹各緣由理合會同協辦大學士兩江督臣曾國藩浙江撫

臣左宗棠恭摺馳陳伏乞

皇上聖鑒訓示謹

奏

松滬近日軍情摺

同治元年閏八月二十三日

奏爲縷陳松滬近日軍情恭摺仰祈

聖鑒事竊臣自八月初間擊退北新涇大股援賊欽遵八月二十

二日

寄諭督飭將士分布要隘嚴申警備隨時緘商督臣曾國藩豫爲籌畫進攻蘇城之計並探鮑超一軍進抵何處務期聲勢相接乃可深入夾攻連接上游來信洪容海所部復叛廣德再陷僞忠王輔王各股援賊屬集甯廣太平一帶鮑超曾國荃之師疫病太多未知攻剿若何極爲焦慮臣由上游帶來水陸各軍自夏徂秋奔馳苦戰積受暑溼疫癘大作病者十之六七死亡亦眾現分紮數路其金山衛張堰各營專防浦東以當平湖乍浦來路青浦塘橋虹橋北新涇各營專防浦西以當崑山嘉定來路署提臣黃翼升

水師分紮澱泖湖一帶兼防蘇州嘉興來路目下分防各處兵單甚覺可虞將來進規蘇州人少更不濟事現仍派員赴皖江添募十營並由曾國藩督催總兵李朝斌募造太湖水師駛至松滬會剿均須三四月後乃可齊集至華爾傷亡所遺常勝一軍據蘇松太道吳煦稟稱擬派華爾部將白齊文法思爾得會同管帶英酋又欲另派兵官接管經臣於本月初六日專摺奏報在案適英國水師提督何伯至自煙臺十四日同英國陸路提督士禮佛必攜帶白齊文來臣營晤商何伯面稱白齊文材勇可任無庸由英國派員接管且無庸令法思爾得會帶以一事權並與臣議明剋日會攻嘉定縣城臣查法思爾得現往甯波防剿臣向未見其人白齊文亦初見面均未悉其底蘊既據何伯推誠相屬自應照准此後果聽調遣以希得力與否再由臣隨時察看據實奏

聞英國新換水師提督不日到滬何伯卽當交卸回國惟以四月  
閒嘉定退出爲憾必欲克復此城以雪前恥臣以蘇賊上援正宜  
設法雕勦藉圖牽制俟何伯白齊文進兵卽令我軍分路協攻如  
可得手卽派我軍駐守除俟進兵若何情形續行具奏外合將近  
日軍情專摺由驛馳陳伏乞

皇上聖鑒訓示謹

奏

水師蘆墟勝仗片

同治元年閏八月二十三日

再記名總兵王東華等督帶淮揚師船在澱山湖口駐泊堵剿八月閒踏毀石人廟賊卡當經臣附片具

奏在案其澱湖迤西之蘆墟地方係吳江縣所屬查有賊匪千餘築壘一座並有賊船數十隻攔截河面王東華稟商署提臣黃興升設法往攻閏八月初六日寅刻黃興升親至澱山湖派參將張元隆張光泰攻其左副將成俞則參將朱有勝攻其右王東華及參將周國興由中路進及抵蘆墟賊船排列鎗礮齊施我軍奮勇直前頻開大礮賊不能敵會黃興升另派小隊登岸抄後將賊壘攻破水陸紛紛敗退我軍追過蘆墟賊仍於湖面回列成陣抵死抗拒見我軍三路並至轉舵驚遁王東華等追擊數里殺斃溺斃之賊不計其數遙望尤家莊一帶復有賊卡賊壘我軍乘勝進攻

拔樁而入立將卡鹵踏平斃賊無算維時日已薄暮兼之汶港紛  
歧蘆葦叢雜未便窮追遂各收隊回營共奪獲賊礮船九隻洋礮  
二十一尊旗幟鎗礮百餘件計點我軍陣亡勇丁羅長卿一名由  
黃興升咨報前來理合附片馳陳伏乞

聖鑒謹  
奏

請飭多隆阿回援金陵摺

同治元年閏八月二十四日

奏爲大股援賊上犯金陵甯國各軍病勇太多恐難久禦強寇請  
旨速飭多隆阿統軍來援以維大局而助成功恭摺陳仰祈  
聖鑒事竊僞忠王輔王等調集各路逆匪上援賊勢浩大正深焦  
慮接據江蘇藩司曾國荃閏八月初十日稟稱近日疊訊賊供僞  
天王尙據金陵老巢僞忠王頭隊已抵丹陽擄掠九十月間定必  
合力謀我該司從前進兵時勇力強壯尙能戰守又恃鮑超一軍  
可速來援不意夏秋以後疾疫流染每營病故八九十名勇病日  
多其無病者不過一二成隊似此光景不惟難以制賊卽自守亦  
無把握鮑超軍士疾病死亡相等勢不能速離甯國且恐爲僞侍  
王等牽制或僞忠王橫截其間與金陵隔絕該司深入危地不可  
孤立無援儻羣賊環至亟肆疲我病軍不能禦強寇南岸別無援

師支持日久何堪設想請會商督臣官文曾國藩奏調多隆阿折  
回渡江會剿俾軍心有可指望等情前來臣查偽天王洪逆潛移  
蘇州之說係七月間由蘇逃出偽職劉萬東來滬臣與黃翼升當  
面詰訊據供云然臣比於奏報中附陳並聲明恐未確實不謂竟  
屬謠傳楊深惶悚大兵之後災疫流行軍中尤甚鮑超曾國荃所  
部轉戰勞苦其致病之由殊堪憫念惟各路探報偽忠王李秀成  
偽輔王楊輔清偽護王陳坤書等合股上竄分援金陵甯國偽侍  
王李世賢又欲由浙東併力來會蓄謀甚狡股數甚眾適值鮑超  
曾國荃兩軍病疫繁興之際如曾國荃前敵營盤稍有蹉跌則太  
平蕪湖防兵皆單賊可循江邊上竄而鮑超一軍且受圍困不特  
關繫蘇浙兩省之全局實關繫皖南江西數省之全局也八年李  
續賓之於三河以孤軍無援而敗皖鄂因之騷動十年和春張國



櫟之於金陵以後路圍困而敗蘇浙因之靡爛前鑒具在不可不思患豫防東南軍興以來湖北江西安徽數省戰爭不休生民待盡經曾國藩胡林翼等選將練兵艱苦經營十年之久上游始報肅清今各處敗賊聚於蘇浙一隅勢漸衰弱其機會固難得矣臣愚以爲宜趁此時合眾人之力以謀之張四而之網以困之使其衝突不動窮極思散庶幾有平賊之一日此賊平則淮北之捻匪陝西之回匪河南山東之教匪四川貴州之苗匪聞之膽落自當漸次削平

聖主中興之大業可立致矣統計現在上下游各路兵數皆僅可自立而不可以進援甯國金陵近日軍情亦僅可以守而不可以戰非另有大枝援兵則賊勢將不可制曾國藩先以秦中事急屢次奏止多隆阿南來彼時金陵防務猶平且盼鮑超能進東壩不

圖洪容海投誠事既中變鮑軍疫病增多波折忽生可憂甚大伏思前奉

諭旨令勝保督辦陝西軍務勝保威望素著或可獨任陝事多隆阿忠勇智略眾所共推粵賊惟陳玉成最悍乃爲多隆阿擒滅忠輔侍各逆必畏多隆阿之先聲多隆阿所帶馬步隊皆百戰勁旅與鮑超曾國荃共事有年深相投洽從前每遇急難亦常相救助儼蒙

皇太后

皇上俯念江南事體重大

飭令多隆阿迅速取道河南皖北由和州逕趨金陵兩三月間即可南渡旣收駕輕就熟之效必有擒渠埽穴之功曾國荃勇於進取已抵金陵城下當能堅忍苦守以待援師若無援救之人終恐

莫保若非多隆阿之力亦斷不能援臣智慮短淺何敢妄議大局且不知陝省近日勦辦情形若何惟據曾國荃函稟情詞迫切臣待罪蘇撫既欲早復財賦之區稍濟京餉仰體

君父之念又懼事勢多變前功盡棄全局復壞權度時宜不得不激切上陳曾國藩相距較遠往返函商動輒踰月若待商定會奏多隆阿卽期更恐遲誤是否有當謹冒昧專摺由驛奏

聞伏乞

皇太后

皇上聖鑒訓示采擇施行謹

奏

克復嘉定縣城摺

同治元年九月初六日

奏爲中外官軍克復嘉定縣城乘勝擊退援賊恭摺馳陳仰祈  
聖鑒事竊本年四月間嘉定縣城復爲賊踞嗣後蘇崑大股逆匪  
屢由嘉定竄犯滬防必應力圖克復英國水師提督何伯每以上  
次西兵退出爲憾今當交卸回國疊赴臣營商籌進勦並約定克  
城後由臣派兵防守臣於閏八月二十三日專摺陳明在案二十  
八九等日英提督何伯會同新任水師提督固伯帶英兵一千八  
百餘名並法國官兵四百名臣又調派三品頂戴白齊文參將李  
恆嵩管帶常勝軍一千五百名英法教練勇會防局礮勇千餘名  
分起拔隊復派知縣李鶴章督帶親兵及桂字建字介字各營總  
兵況文榜熊兆周副將梁安邦梁勝章各帶所部相繼而進沿途  
踏燬賊卡二座九月初一日直抵嘉定城外駐紮初二日寅刻分

隊進攻英法兵及常勝軍教練各勇攻打東南兩門李鶴章督令游擊黃中元張桂芳張樹珊周盛波縣丞余思樞三品頂戴吳建瀛各營攻打西北兩門況文榜等各派隊伍並知府符信一營及署嘉定縣知縣張潛所帶練勇分投扼要設伏何伯指揮西兵連夜築成礮臺連環開放炸礮該逆仍以鎗礮抵死回拒我軍輪流環擊計歷三時之久轟倒南門城牆十餘處賊勢不支我軍分布雲梯一擁而上西兵同時登城擊殺守垛悍賊多名旋開東門大隊一律入城搜剿賊乃拚死由西門奪路狂奔經吳建瀛奮力兜截擒賊無數並合兩路伏兵追殺十餘里突有偽天將黃姓徽天義潘姓由太倉糾合大股悍賊來援將馬隊數百攔橋迎堵把總夏長勝白萬和躍馬過橋衝入賊陣均中鎗陣亡適各營洋鎗小隊趕至余思樞等督令連環施放賊始披靡卽有偽徽天安田邦

哲率眾百餘跪降馬前因令棄械隨行分別安置當將嘉定縣城克復計先後生擒賊匪六百餘名殺斃淹斃者約三千餘名解救難民甚眾此初二日攻克嘉定之實在情形也臣查嘉城爲蘇滬門戶我與賊所必爭英國提督何伯與臣再四會商謀定後動中外將士同心輯睦分路進攻崇朝而下堅城其神速尤不易得除一面飭派況文榜熊兆周梁安邦梁勝章等督率兵勇會同該縣張潛入城分門駐守並令李鶴章將虹橋塘橋各營進紮南翔一帶總兵程學啟分統數營進紮黃渡一帶商請署提臣黃翼升酌派水師二營進扼崑山大河來路以防蘇崑太倉之賊合股回竄並查明在事尤爲出力員弁兵勇分別奏獎外至英提督何伯不日回國尙爲中國出力勦賊忠勇可嘉可否仰懇天語褒獎以示優異此次力戰陣亡之把總夏長勝白萬和應請

敕部從優議卹所有克復嘉定縣城緣由謹會同通商大臣臣薛  
煥合詞恭摺由六百里馳陳伏乞

皇上聖鑒訓示謹  
奏

逆賊圍攻四江口摺

同治元年九月十九日

奏爲蘇崑杭嘉逆賊糾合大股十餘萬圖撲青浦嘉定各城圍攻四江口營盤飛飭水陸各軍赴援情形恭摺馳陳仰祈

聖鑒事竊中外官軍會克嘉定縣城當將派兵分守各情於初六日

奏報在案該逆以我軍旣克嘉定必乘勢進剿崑蘇僞慕王聽王等糾合蘇州嘉興杭州各處踞賊十餘萬由崑山太倉分進迎拒我師護其巢穴一股由安亭竄方泰鎮圖撲南翔以絕嘉定後路一股由蟠龍竄四江口圖撲黃渡以截青浦來路十二三日北路一股竄近南翔十五日李鶴章商令游擊銜吳建瀛帶建字三營紫隊南翔之北李鶴章帶本標親兵及桂字樹字介字四營副將郭松林帶督標親兵及松字雲字四營均向南翔之西沿路抄擊



忽見陸家行賊旗密布方泰鎮踞賊亦列隊迎拒李鶴章回禦陸家行之賊郭松林進剿方泰鎮之賊陸家行各逆見我軍分路並進向東狂奔方泰鎮賊抵死不退郭松林帶千總李長樂縱馬直入賊隊往來衝殺李長樂手刃三十餘賊逆勢披靡游擊黃中元參將陳有昇大隊踵至分投擒斬追殺十餘里生擒一百三十餘名斬獲首級數百顆奪獲旗幟洋鎗無數訊據生擒各賊僉供偽慕王宿衛精兵是夜吳建瀛亦於方泰鎮西北攻破賊卡二處生擒逆匪七名內有偽宿衛天軍主將一名訊明正法其南路一股實數約七八萬人先於初七日自蟠龍鎮至四江口對岸排列游擊鄭國魁參將劉士奇督隊迎擊總兵程學啟由黃渡帶隊助剿賊勢少卻乃該逆自蘇州陸續添到礮船百餘隻民船千餘隻水陸夾進疊經參將宋有勝張光泰知縣馬玉麟千總鄭國榜督帶

師船分頭堵剿晝夜力持至十四日該逆連夜於三江口四江口環紮賊營五座並偷搭浮橋渡江內竄將劉士奇鄭國魁張光泰水陸各營層層圍裹十五日辰刻程學啟陳飛熊各帶隊伍援剿開放洋鎗劈山礮斃賊多名該逆陣勢甚厚死擊不散鄭國魁劉士奇兩營久被圍困同張光泰等併力由內搥擊傷斃多賊我軍亦有傷亡劉士奇被洋礮子打穿右耳門仍裹創督守而青浦西北之洋新涇趙屯橋白鶴江等處賊勢蔓延並擾及重固張堰一帶距青浦十餘里十六日署提臣黃翼升派令總兵王東華副將成俞卿參將宋有勝分師船爲三隊由青浦進援自督親兵左營繼進逆賊蜂擁前來各營排礮轟擊且戰且進殲斃黃衣賊目數十名衝入八九里將至白鶴江兩岸賊旗如林洋鎗如雨賊眾一二萬扼斷隘口哨官周再升中礮陣亡弁勇傷亡數十名該處河

窄隄高行駛不便黃翼升督隊將附近小橋拆斷數道阻賊來路  
徐徐收隊回青上又派令李鶴章等乘南翔北路賊勢稍減抽出  
江橋五成隊伍由紀王廟前往黃渡與程學啟合軍援擊惟賊數  
過眾兵力過單未卜能否得手此南北兩路同時喫緊分派援剿  
之實在情形也除續後援勅若何再行具

奏外所有蘇嘉逆賊糾合東竄圖撲嘉定青浦並四江口被圍危  
急飛飭水陸赴援緣由謹由驛六百里馳陳伏乞

皇上聖鑒訓示謹  
奏

程學啟不能赴援金陵片

同治元年九月十九日

再疊准督臣曾國藩咨函以大股援賊麇集金陵攻撲官軍壕壘  
自閏八月二十日至今更番晝夜不憩危險萬狀請派記名  
總兵程學啟一軍暫棄青浦雇坐輪船趕赴金陵援剿等語臣查  
金陵官兵勢成孤注偽忠王李秀成率領各股逆眾上犯蔓延甚  
廣攻撲甚力臣早爲懸慮業於閏八月二十四日專摺請

旨飭調多隆阿統軍回援曾國藩一軍關繫東南數省全局雖臣  
相距較遠人數較單必當設法派援期補救於萬分之一曾國藩  
發函時尙未知嘉定克復程學啟已調紮黃渡前敵其青浦縣城  
已另派記名總兵滕嗣武帶千人接防現在偽募王聽王各黨恐  
我軍乘勢入蘇糾合蘇常杭嘉守賊十餘萬由崑太水陸並進圍  
撲黃渡四江口頭敵營程學啟督所部二千晝夜搏戰十餘日

尚未解圍臣處各軍赴救不遑若令程學啟遠去賊眾深入松滬  
更危惟查有三品頂戴白齊文接管華爾常勝軍此次攻克嘉定  
頗資其力該軍四千餘人打仗向稱奮勇所有西洋炸礮大礮各  
利器購備夙多施放亦便自有輪船數隻再添雇數隻可敷行駛  
臣已飭派署藩司蘇松太道吳煦前蘇松糧道楊坊督同白齊文  
趕緊籌措行裝駛往金陵協力援應其行抵該處應如何會合攻  
剿由督臣曾國藩核飭吳煦楊坊轉飭白齊文遵照當可得力除  
俟該軍啟程另行奏報外理合附片馳陳伏乞

皇上聖鑒訓示謹

奏

郭嵩燾請無庸迴避片

同治元年九月十九日

再據新任蘇松糧儲道郭嵩燾詳稱該道與督臣曾國藩爲兒女姻親照例呈請迴避等語臣查蘇省吏治凋敝臣到任後力求整頓奏請將郭嵩燾補授斯缺原期得人佐理漸挽頽風郭嵩燾學識品行眾論交孚久邀

聖明洞鑒自咸豐十年假旋後杜門息轍澹然寡營曾國藩胡林翼屢招不至李續宜兩次奏調亦未赴營絕非世俗希榮干進者可比臣接奉

俞旨卽疊次飛函敦促並請曾國藩代爲勸駕該道感蒙

聖主特達之知顧念親舊引嫌之義進退趨避之又久而後抵滬受事復以迴避呈請開缺在該員守官常之定例原非與退讓之虛文惟江蘇軍務正殷需才甚急可否仰懇

聖主逾格恩施暫令郭嵩燾毋庸迴避卽以蘇松糧道襄辦臣營  
軍務俾收羣策羣力之效是否有當伏乞

聖鑒訓示謹附片具

奏

四江口解圍摺

同治元年九月二十八日

奏爲督率官軍合力援剿三戰三捷大破賊於四江口立解重圍餘匪遁回崑蘇恭摺馳陳仰祈

聖鑒事竊蘇崑杭嘉大股賊匪十餘萬圍撲青浦嘉定圍攻四江口營盤飛飭水陸各軍赴援情形於本月十九日

奏報在案自十五六日以後該逆愈聚愈多由青浦西北至三江口四江口蔓延數十里連營數十座晝夜出戰我軍魁字奇字兩營被圍甚急消息不通糧藥將盡賊復於大河支港偏搭浮橋擡及黃渡十七日李鶴章由江橋馳赴黃渡會同程學啟分爲三路進剿賊見我軍出隊卽於河南岸各橋布陣以待程學啟率開字三營由右路進撲石橋賊蜂擁迎敵鎗礮齊施程學啟大呼殺入賊乃紛潰直追至老青浦街前斃賊不少該逆犯我左路副將張



桂芳游擊張樹珊周盛波蒞中元等揮兵過河戰十餘合賊以洋鎗死抵子如雨注李鶴章飭令各營以劈山礮排轟擊斃無數賊始披靡中路之賊亦經副將郭松林擊敗賊卽入壘固守時己申刻我軍亦有傷亡遂令收隊此十七日獲勝之情形也十八日該逆堅伏不出所有十七日我軍進攻橋路賊已紮卡勢難徑渡李鶴章程學啟等因赴河北踰看地勢議由北岸分路而進十九日辰刻我軍出隊方行三四里該逆先由左路迎來勢極兇猛經程學啟督同張桂芳周盛波竭力抵禦鎗斃賊眾數百賊乃抽隊繞我右路經郭松林張樹珊等埋伏河邊乘賊半渡突出奮擊斃賊千餘中左兩路逆匪遂分隊赴援約有四五萬眾程學啟揮令周盛波馳赴右路助戰參將陳飛熊知府符信各營由中直進將賊隊擊斷李鶴章知會三路一齊擁入該逆紛紛敗退追至安亭河

邊僞慕王聽王親督大隊迎拒各以洋鎗隔河施放潛由我軍之  
後搭橋渡過數百人程學啟抽隊擊敗之悉殲其眾北岸賊隊漸  
撤向南我軍遂亦收隊以防南岸此十九日獲勝之情形也兩日  
殺賊不下四五千而賊眾且悍我軍人人殊死戰營官大都受傷  
陣亡員弁至十三名之多此外傷亡勇丁約計亦有六七百人賊  
猶未退十八十九等日黃翼升派副將成俞卿參將宋有勝等分  
帶師船進剿杜村自督親兵舢板進剿洋新涇八字橋該逆以洋  
鎗猛拒當飭總兵王東帥帶隊轟斃多名賊即敗走仍在趙屯橋  
抵守不下臣以賊勢蔓延四江口久圍未解非添撥大隊親往督  
戰不可連夜撤調駐守浦東張堰之參將劉銘傳帶洋鎗小隊四  
百人前來助戰並調駐守南翔之游擊銜吳建瀛帶三成隊伍又  
調白齊文常勝軍一千人由松江逕赴重固截剿又函約黃翼升

帶水師各營由青浦進赴屯橋截剿臣自帶英國教練洋鎗隊周志鴻等七百人於二十日馳赴江橋添調各營隊伍二十一日行抵黃渡周覽賊營形勢偽募王一股屯駐吳淞江北岸自十九日挫衄後賊氣漸衰惟南岸偽聽王一股偽主將鄧光明一股約眾七八萬爲忠逆李秀成部下著名兇悍洋鎗約有數千桿衝突無前其所紮營壘皆扼河汊要口攻取甚難因激厲諸將詰朝會戰二十二日辰刻派程學啟統開字三營熊字兩營曾字一營當右路之賊劉銘傳統銘字樹字桂字及撫標親兵各營當中路之賊郭松林統松字介字雲字及督標親兵兩營當左路之賊臣帶建字三營居中調度飭李鶴章分路催督自辰至未屢衝不動賊旗林立四望無際臣誓將士以有功必賞退後必斬郭松林劉銘傳兩路突倡賊營拔籤踰壕以洋鎗小隊膝行而前擊倒黃衣賊酋

敗名賊眾稍卻猶以鎗礮抵拒乃冒煙直入各斃悍賊數百郭松  
林同符信陳有昇何映文乘勢踏毀頭營兩座賊大潰退劉銘傳  
張樹珊張桂芳又攻破中路賊營二座其右路大股之賊抽隊回  
救程學啟胸受子傷痛不可忍瞥見賊旗掣動乃裹創督戰與陳  
飛熊吳建瀛以二千餘人連環鎗礮緊跟壓下賊隊立腳不住由  
南岸潰向北岸我軍三路圍殺賊紛紛竄逃所過各河港浮橋均  
被逆眾踏斷人馬落水死者以數千計河水爲之不流生擒及殺  
斃者又萬餘人內有偽主將義安燕豫福指揮檢點數百人連毀  
賊營二十餘座奪獲洋鎗礮械馬匹偽印旗幟七八千件四江口  
之圍立解劉士奇鄭國魁復派隊由河岸截剿又擒斬數百人張  
光泰鄭國榜各帶礮船在中流橫擊又羸斃百餘人追至河邊天  
已昏黑三更後北岸僞慕王一股卽退回崑山是日白齊文李恆

高帶隊由杜村進白鶴港圍攻賊巢環鎗破斃賊極多擒獲千餘名黃翼升督帶王東華成俞卿宋有勝各營由趙屯橋截擊潰賊追至三江口轟斃無數並踏平沿橋石壘四座兩岸土壘八座立將浮橋拆毀臣復督帶各營至四江口拊循守卒籌度布置旋即整旅回滬此二十二日親督各軍大破賊於四江口立解重圍之實在情形也臣查該逆恐我軍深入糾合蘇嘉杭湖數僞王之眾圍撲四江口前敵水陸四營必欲打破此關竄陷嘉青復窺松滬爲先發制人之計經劉士奇鄭國魁等堅忍苦守程學啟郭松林等督隊苦戰十七十九兩仗斃賊已多猶敢築營圍困死力抗拒臣復調齊各路兵將親督鏖戰仰蒙

皇上威福殲擒悍賊至一萬數千名之多實賴軍士用命獲此奇捷足以寒賊膽而快人心所有尤爲出力之記名總兵程學啟謀

勇山眾紀律精嚴可否請

旨遇有總兵缺出儘先提奏並

賞加提督銜副將郭松林每戰當先力摧狂寇可否請

旨以總兵記名簡放江蘇卽補參將劉銘傳血性忠勇屢救危難可否請

旨開復暫行革職處分以副將儘先推補參將陳飛熊張桂芳游擊張樹珊黃中元周盛波臨陣奮往可否均請

旨寬加勇號陳飛熊張桂芳並請以副將儘先推補張樹珊並請以參將補用游擊銜吳建瀛可否請加副將銜參將劉士奇張光泰游擊銜都司鄭國魁把總鄭國榜被圍十五晝夜死守待援劉士奇張光泰可否均以副將補用鄭國魁可否免補游擊以參將儘先補用鄭國榜可否免補千總以守備儘先補用出自

皇上逾格恩施其餘出力員弁兵勇容臣查明彙案保奏至力戰陣亡都司劉玉勝藍加興守備黎高陞曾廣道汪中雨千總何長慶把總李得秀周蘭桂童邦選米春榮外委袁得林余學祥王德興均請

敕部從優議卹其餘陣亡兵勇容臣查明咨部照例辦理所有官軍合力援剿三戰三捷大破賊於四江口立解重圍各緣由謹專摺由驛六百里馳陳伏乞

皇上聖鑒訓示謹

奏

覆議江南糧臺歸併江北摺

同治元年十月十九日

奏爲欽奉

諭旨恭摺陳仰祈

聖鑒事竊臣等欽奉閏八月初一日

寄諭有人奏請將江南糧臺歸併江北辦理等語據稱江北地方現設南北兩臺南臺係候補道許如駿辦理北臺係候補道許道身辦理一臺有一臺之用一切委員局費在所必需當此經費支絀之時南臺一局大可歸併北臺辦理不獨撙節度支卽將來北岸肅清各營渡江會勘糧臺事權歸一呼應尤靈亦因時因地量爲變通之法惟兩岸餉源盈絀懸殊恐致彼此互相牽混惟有分明界畫以南臺籌定水陸進款專供水陸兩營之用北臺向有之款專濟北營不得絲毫通融辦理仍無窒礙等語所籌係爲慎重



餉糈起見於現在情形亦相符合著李鴻章吳棠詳細籌商若令許道身兼辦南北兩臺有無窒礙抑或仍須令許如駿分辨之處據實具奏等因欽此臣等跪誦之下仰見我

皇上樽節餉需整頓臺務之至意伏查南北岸皆隸蘇省從前南軍駐金陵北軍駐揚州相距較遠因地籌餉不得不分臺供支自金陵大營潰散江南財賦全失僅馮子材一軍退守鎮城與揚州一江之隔兩岸水陸各營聲息相聞本無庸分作兩臺徒添委員局費之需且啟畛域紛爭之漸現在南臺進款經臣等於七月間奏定有案鎮江陸營軍餉除滬上協款及鎮關洋稅外仍須由江北籌濟水師軍餉以沿江釐金爲大宗亦應由江北督查若以北臺兼辦南臺係屬就近經管事理極順況北岸肅清後揚州稍設防兵亦應分軍渡江會勦誠如原奏所稱糧臺事權歸一呼應尤

靈是併臺之議於目下地方情形固無窒礙於將來軍務全局且有裨益等往返面商並察看候補道許道身精明幹練才具優長以之總辦兩臺可期勝任應卽將江南糧臺歸併江北統歸許道身一手經理其鎮營支應本由南臺派員承辦今南臺既撤查有鎮江府知府金以誠熟悉情形應令隨營支放仍由許道身總司其事該營除正餉外一切軍火製造須隨地隨時通盤籌畫其南北支放及水陸分解事宜悉照向章辦理卽有時通融緩急仍不准牽混絲毫一面飭令候補道許如駿交卸南臺趕緊造報無須再令分辨該臺委員併行裁撤以節靡費而歸劃一至許道身本任泰州知州現在兩臺合併支發浩繁恐難再顧地方公事應卽另委接署俾得專心籌辦等仍當隨時查察責令該員將裏下河各屬丁漕督催各州縣實力徵解沿江口岸各項釐捐會同

水師鎮將逐加整頓核實支放以期滴滴歸公庶於併臺節餉章程不致有名無實欽奉

寄諭遴委江北大員勸捐兵米一節臣等查上年江北捐借共派四十萬兩係按淮揚通海十四廳州縣分派現仍仿照勸辦改捐借爲捐米統清淮滬上南北臺併爲一捐由各屬印委認定捐數銀米並繳分限分解兩淮鹽運司喬松年素顧大局條理精當臣等已飭委該運司督辦會同許道身妥速籌勸其印委各員認真出力者准予優獎怠玩違誤者立予撤參如此明定章程於捐餉可期踴躍所有臣等遵

旨會議各緣由是否有當謹合詞恭摺覆

奏伏乞

皇上聖鑒訓示遵行謹

三  
癸

克復上虞縣城摺

同治元年十月二十五日

奏爲甯波中外官軍疊獲勝仗力保餘姚並攻克上虞縣城餘匪遠遁恭摺奏祈

聖鑒事竊八月間奉化慈谿再陷甯波軍情喫緊迫兩城先後克復上虞賊匪又竄陷泗門鎮員外郎謝敬一軍潰散慈谿餘姚復形岌岌節據甯紹台道史致謨稟報在案茲復據稱該逆屯踞泗門馬渚復分股立卡澣山沈山頭並擾及後山北沈師橋魯家橋等處慈餘兩邑警報日至該道將謝敬一勇招集名曰信義軍尙有千數百人無人統帶不得已暫留已革道員張景渠前赴餘姚督率進剿一面會商英國總兵呿藥德克稅務司日意格派撥輪船三隻並調游擊吳長安守備張其光同知鄭維春等師船九隻分赴丈亭太平橋姚江等處巡扼又抽撥綠頭勇三百三十名協

同游擊李光靖逆軍一千一百名張其光廣濟右軍四百名嚴守  
慈谿又令幫辦甯紹軍務之法國參將勒伯勒東赴餘整隊以待  
日意格亦督帶洋兵五十名同往張景渠抵餘連日派隊擊退附  
近賊匪因與勒伯勒東及已革護提督陳世章籌議直搗上虞賊  
巢使泗門許山之賊不能久踞九月二十七日勒伯勒東日意格  
帶領洋兵二百名花頭勇一千名同知銜謝采嶂帶領黃頭勇六  
百名法國兵頭科客知府王維圻帶領綠頭勇八百名均於黎明  
拔隊直趨上虞張景渠派中書謝錫藩帶領信義軍六百名會同  
法國參將買武勒德格先赴泗門約合民團力防內竄飛調慈  
防李光張其光各帶七成隊伍約合游源團勇由許山一路兜剿  
派州同謝國恩縣丞查廷楨帶信義軍六百名接應各路陳世章  
及代理紹興府知府楊叔樸餘姚縣知縣陶雲升同護游擊汪雲

龍等兵勇一千二百餘名留守餘城張景渠部署既定卽督帶各隊相繼而進突見餘城北門外紅米山逆旗布滿卽令謝國恩查廷楨汪雲龍吳長安各率所部由山後包抄左右夾擊並令前署山陰縣知縣莊鳳威前署會稽縣知縣邊厚慶帶勇往來策應賊果蜂擁來撲我軍鏖斃前隊數十名該逆後隊併進適汪雲龍吳長安從山坳左右殺出謝國恩查廷楨從山頂馳下四面合剿查廷楨奮勇當先陡中礮子陣亡各軍憤激力戰轟斃騎馬賊目一名殺賊三四百名生擒老長髮四名姚江各船同時開礮助勢該逆敗向西北而去訊據賊供僞戴王偵知官兵直攻上虞分遣黨眾由泗門馬渚翻山先撲餘姚再撲慈谿俟潘小鏡子所招廣匪到日合撲甯邵等語二十八日勒伯勒東等偵知餘姚敗匪退向虞城自三十里牌至姚村下塘節節進剿連破賊卡十四座殺斃

賊匪及起獲賊糧無算張景渠親督莊鳳威邊厚慶及同知祕雲  
書守備查聲顯各隊亦於是日馳抵下壩二十九日我軍至謝家  
橋該逆踞守石卡抵死抗拒陣亡黃頭勇三名勒伯勒東日意格  
拒兵偪卡洋兵連放落地開花礮賊轟斃及落水死者約千餘人  
遂乘勝踏毀通明壩賊卡二座三十日我軍直薄城下該逆土城  
木柵層疊環繞日意格督兵攻毀木柵偪至土城日意格躍馬當  
先右臂陡中鎗子落馬洋兵負救回營各兵勇見將領受傷誓必  
破城當晚不肯收隊勒伯勒東運到車輪大洋礮轟坍土城城上  
鎗礮如雨我軍冒煙布梯洋兵黃頭勇先登各軍蟻附而上砍倒  
守垛悍賊餘賊從西南兩門竄遁遂於十月初一日卯刻將上虞  
縣城克復前後斃賊數千生擒二百餘名我軍亦有傷亡其沈山  
頭許山泗門馬渚之賊經李光張其光謝錫蕃謝國恩買忒勒等



合力靖蕩餘姚全境肅清初五日日意格同甯養傷該道親往慰勞所述餘上攻勦情形甚悉并云此次圖勦勝於固守攻卡難於攻城若稍涉遲疑潘小鏡子所招廣匪與逆匪結連則勦辦更形棘手張景渠調度合宜兵勇樂於用命故能迅速奏功等語該道已屬張景渠暫駐上虞督兵防守一面調布興有等水陸各軍駛赴曹娥江扼守照會嵒藥德克由滬添雇小輪船一隻續往協防等情具稟請

奏並請將張景渠暫行留營前來臣等伏查甯郡兵勇不過萬餘當泗門失陷餘慈交警實有防不勝防之虞該文武以勦勝於防定計先攻虞邑連戰皆捷遂復堅城從此扼守曹江甯郡之藩籬益固進規紹郡金衢之聲氣漸通於浙東大局殊有裨助法國參將勒伯勒東自奉

旨准受中國官職感激圖報英國水師總兵呿藥德克屢次助援甯關稅務司日意格奮不顧身通達大體均擬請

天語褒獎以示榮寵杭協城守營外委陳鑑堂軍功胡順富劉金元朱超良林士柯林榮堃等六名首先登城應請以把總儘先拔補已革甯紹台道張景渠當史致謬未到任之先聯絡西兵連復數城迨史致謬到甯後以該革道能見信於外國官弁和衷共濟深得紳民士卒之心籲請留營襄辦臣等未敢率予批准此次會督中外各軍攻克上虞據史致謬函稱張景渠不避艱險調和得體可否懇

恩暫緩拏問准予留營以觀後效出自

逾格鴻慈陣亡候選縣丞查廷楨應請

敕部從優議卹其餘在事出力員弁紳董及傷亡兵勇卽飭該道

吏致謬查明分別

奏請獎卹臣等續據該道來稟嵯縣新昌兩城又於十月初五初六等日相繼克復除飭將詳細情形查明稟報月行具

奏外所有中外官軍力保餘姚克復上虞各緣由謹合詞恭摺由驛馳陳伏乞

皇上聖鑒訓示再臣宗棠駐軍龍游賊氛中阻所有甯波文報必須繞道蘇皖等省非一兩月不到此次克復上虞頗藉外國官弁之力亟應破格

奏獎遂其效忠之願未便過事稽遲是以由臣鴻章就近主稿聯銜具報合併聲明謹

奏

覆奏曾秉忠金鴻保參案摺

同治元年十月二十五日

奏爲欽奉

諭旨查明覆陳恭摺仰祈

聖鑒事竊臣欽奉九月二十一日

寄諭有人奏曾秉忠自革職後延不交卸縱兵通賊到處擄掠強

搶婦女劫人勒贖八月間將角直鎮焚掠一空殺戮良民無數並

肇局委員金姓閩姓貪婪庸劣請飭查辦等語曾秉忠之缺既令

黃翼升接署何以尙未交卸著曾國藩李鴻章查明勒令交卸迅

飭赴營差委毋任逗留該革員所部均係廣勇此時未便操之過

遽致生他變著李鴻章查明如有前項劫掠等弊設法遣散回籍

免生事端委員金姓涼係知府金鴻保該員與閩釗等狼狽爲奸

人所共知閩釗命案既經李鴻章查參金鴻保事同一律豈可獨

邀寬免著該督撫懷遵前旨卽行嚴參仍爲人言所欺致除惡不盡於吏治難期整頓等因欽此仰見我

皇上整飭官常除惡務盡之至意跪讀之下悚惕莫名臣查已革提督曾秉忠約束不嚴疊經都中糾劾臣到任後卽欲將該部船勇全行遣撤六月間臣與署提督黃翼升前往泖澱周歷各營察看水路情形西與蘇州接壤南與嘉興接壤湖河汊港千百縱橫黃翼升所帶淮揚水師除分留金陵揚州各處外陸續來滬百餘號實屬不敷分布維時防剿萬緊黃翼升以獨力難支商請暫留曾秉忠船隻臣不得已將該革員水師三百六十隻裁去一百六十隻挑留二百隻旋又裁去三十隻飭令嚴東營規協同黃翼升分投堵剿並商請曾國藩飭催處州鎮總兵李朝斌太湖師船一百六十隻改由松滬進兵以備替換現在黃翼升師船分防蘇州

崑山各來路曾秉忠師船分防嘉興平湖各來路路喫緊其勢  
實未可遽撤李朝斌新造船隻須明年春開成工可否俟李朝斌  
下駛再勒催曾秉忠赴皖差委至曾秉忠所部廣勇從前劫掠之  
案層見疊出七月間進剿角直鎮將賊擊退復又肆掠臣聞信後  
卽咨飭嚴辦旋經臣拏獲馮日坤正法該革員漸知儆畏數月以  
來營規較肅與民相安原奏所稱縱兵通賊實無其事此後或有  
焚掠擄殺實據臣當隨時懲辦設法遣散回籍斷不稍事姑容至  
黃翼升於八月二十一日接署提督篆務曾秉忠當卽交卸所部  
船勇黃翼升以各分地段未便兼統惟黃翼升軍規整肅曾秉忠  
船隻漸少其勢自足相制月前嘉善平湖賊股內犯曾秉忠督船  
堵剿亦尙出力未必無感愧奮興之意此曾秉忠暫留原防未能  
速撤之實在情形也同知銜候補知縣金鴻保本爲吳煦私人蘇

省吏治貪詐朋比積習相沿皆由一二人倡之於上才智之士爭趨風氣其咎固不盡歸之屬員五月間殷兆鏞奏稱去秋道署門前有人謀一大龜以俞斌爲首金鴻保爲背閔釗爲心腹蓋誠有之該三人者才具頗長而俞斌經手各捐局弊竇尤多閔釗與開幕句連不無狼狽爲奸之處臣故不得不嚴劾以警其餘惟察看金鴻保才力精敏實在俞斌閔釗之上該員於滬中捐釐各局情形極熟利弊周知臣欲整頓釐務亦不得不暫資熟手臣初抵任時每詢吳煦關稅釐捐月收幾何謂均不過十餘萬臣以關稅係洋人稅務司經收無甚弊混且外國會防及教練兵勇費用向由吳煦經放關稅所入先儘洋兵開銷所餘無幾實不足分給軍需六月間臣卽另派安徽候補道王大經常州府知府薛書堂管理捐釐總局詳定章程嚴剔弊端使之滴滴歸公專供松滬水陸各

軍月餉其總局分局節目條款督同各員往復裁決行之數月漸有成效每月所入多或二十餘萬少亦近二十萬軍賴以接濟稍免飢潰並兩次分濟何國藩軍營九萬兩皆由捐釐項下籌出並未動支關稅絲毫王人經薛書堂操守極好但於滬局情形稍生尙賴金鴻保隨時擘畫而金鴻保所管貨捐局乃釐務大宗每月多或十餘萬少亦八九萬頭緒紛繁綜覈無遺其招怨致謗或由於此臣明察暗訪金鴻保在從前釐政混淆之時恐不能毫無侵染處今日上下肅清之際亦甚欲刻厲自新當此軍餉緊急人才難得果其有一長可取臣何敢稍涉成見盡予罷斥惟有隨時留心查察如該員有貪婪確據立即參劾斷不爲人言所欺致吏治難期整頓此金鴻保暫留釐局有益軍餉之實在情形也所有遵



旨查明覆奏緣由謹專摺緘晰陳伏乞  
皇上聖鑒訓示謹

奏

續徵稅銀請准歸還原借商稅片

同治元年十一月初一日

再據委管揚關由關稅務前常鎮通海道高長紳詳稱前管關道英喜任內咸豐九年三月二十四日徵洋藥稅銀之日起至十年三月二十三日止一年共收洋藥正耗銀三千九百三十五兩零前於九年五月間奉部提撥洋藥稅銀一萬兩當因徵未久稅銀無多於商稅款內借撥湊足解部兌收聲明續徵稅銀歸還前借商稅等情經戶部以揚關徵收洋藥稅銀歸還原借商稅之款尙少銀兩俟續徵歸還核與前議山海關監督烏勒洪額徵解洋藥稅銀於新增盈餘項下抵解案內議令該監督賠補成案不符應令將徵存洋藥稅銀儘數解部如稽口歸還商稅或稱動撥卽著該監督賠補等因具奏奉

旨依議欽此欽遵轉行到關伏查此項洋藥稅銀前道英喜於咸

豐九年三月二十四日奉文啟徵旋於五月間奉部提撥洋藥稅  
京餉銀一萬兩維時開徵未久所徵稅銀不敷起解因奉部文內  
有如洋藥項下尚未收有成數即將本年應徵錢糧先行起解俟  
洋藥收項有數卽爲抵補如有推諉卽由戶部查參等語是以前  
道英肅稟明前撫臣桂於商稅款內撥借銀八千三百七十九兩  
一錢漆足一萬兩委員呈解戶部兌收並於咨解文內聲明俟續  
徵洋藥稅銀歸補前借商稅在案是從前撥借商稅係遵奉部文  
通融籌解准其抵補核與山海關烏勒洪額之案情形不同所有  
此次續徵稅銀應准歸還原借商稅未清之款詳請附  
奏免賠前來相應據情附片陳明可否懇  
恩准予免賠之處出自

皇上逾格鴻慈除咨部查照外伏乞

聖鑒訓示謹  
奏

覆奏近日軍情摺 同治元年十一月十八日

奏爲縷陳近日軍情恭摺

奏仰祈

聖鑒事竊十月二十五日承准議政王軍機大臣字寄十月十二日奉

上諭李鴻章奏擊破四江口援賊大獲奇捷一摺此次逆賊糾合大股圖犯青嘉經官軍擊退賊膽已寒卽應趁此聲威進搗崑山若能將該城克復則松滬之門戶益固卽進剿蘇城之路亦通該逆必應回顧不敢悉眾救援金陵著李鴻章體察情形迅速進攻該撫前奏所稱改造小划兵船計當造成卽可會同黃翼升水陸前進以爲節節進剿之計李鴻章自簡署巡撫以來軍務地方均能稱職頗爲嘉悅已明降諭旨補授江蘇巡撫該撫務當感激知

遇益矢公忠斷不可稍自滿假以期常承恩眷勉之懷之等因欽此仰蒙

聖慈優渥

訓誨周詳感激之餘震悚無地除已具行具摺恭謝

天恩專差齎進外伏查前次四江口大捷擒斬甚眾賊膽已寒若有數路之兵乘勢進擣崑太或冀漸次得手無如臣軍分守浦東西各城既不能併歸一處前敵兵力本單苦戰十餘晝夜疲乏損傷無隊可換必須略予休息蘇常附近州縣賊皆堅守崑山太倉相爲犄角尤爲蘇州門戶賊所必爭必救之地若我以孤軍深入而賊以四面來抄堅城阻於前糧路斷於後此危道也臣之愚計欲俟上游諸軍攻剿得手使該逆奔救不遑然後乘其敝而殲之以收前後夾擊之勢庶無進退狼顧之虞探聞金陵解圍後忠賊

李秀成分股回蘇添守崑太布置極嚴其大股仍分竄甯郡和合  
專走皖南北空虛之地以牽掣上游兵勢臣前派員奔赴皖添募  
十餘營據報陸續啟程督臣曾國藩以蕪湖一帶防務喫緊暫留  
協守急切斷難抵滬臣現有兵數能進一而而不足防數面之抄  
襲能當前路而無以備後路之接應將舍太而圖崑賊可繞嘉定  
以竄入將舍崑而圖太賊可繞青浦以竄入左右籌思尙不敢輕  
進貽誤惟有督率將士嚴申戒備俟有可乘之機卽行奮迅進取  
以期仰慰

宸廑至前奏改造小划已由曾國藩委派處州鎮總兵李朝斌製  
造太湖水師臣與黃翼升復派將弁赴上游添釘船隻目下正在  
興工須明年二三月間配齊弁勇下駛黃翼升所部師船現分扼  
青崑蘇嘉各交界亦待船勇到齊水陸合力節節進剿臣一介庸

儒屢被

朝廷不次之擢當盡其力所能爲勉圖報稱斷不敢因循苟安自  
外生成所有近日軍情及相機籌辦各緣由理合專摺由驛馳陳伏  
乞  
皇上聖鑒訓示謹  
奏



白齊文滋事撤換片

同治元年十一月十八日

再前派常勝軍助剿金陵因白齊文復往甯波調勇遷延時日經  
臣於十月二十五日附片陳明在案嗣據吳煦稟稱該道督帶頭  
隊輪船已於十月二十九日駛抵鎮江一俟大隊到齊定期進攻  
等情其時白齊文已至甯波仍託病未行臣又批飭吳煦楊坊  
等嚴催後隊輪船剋期上駛去後忽據署松江府知府方傳書等  
稟稱本月十四日早聞白齊文由滬回松將城門關閉聞因餉銀  
未發欲率勇搶劫該府同參將李恆嵩暗中設法勸諭通事勇頭  
許以發餉各勇始一開而散白齊文隨卽旋滬臣接閱之下不勝  
詫異正在籌辦間復據吳煦稟在鎮株守旬餘後隊杳不見到不  
得已折回催隊十四夜駛至上海詢之楊坊知白齊文任意宕延  
屢催罔應核計九月以前之餉早已放清十月之餉楊坊亦許爲

措備告以一有起程的期立即應付詎白齊文不但行期無定輒稱不願前赴金陵請辭差使楊坊責以大義白齊文佛然回松十五日已刻又帶洋鎗隊數十人趕至上海楊坊寓中將楊坊與額胃膛打傷吐血不止並將發餉之洋銀四萬餘元強行搶去稟請速行拏辦等情前來伏查外國人性情乖戾威令不行本難駕馭前以白齊文原係常勝軍弁口曾請歸中國版圖已受三品頂戴職銜又經英國提督何伯保薦吳煦楊坊皆久與熟習暫令接帶此軍臣等實未深悉其底蘊是以疊次奏明隨時留心察看將來能否勝任及是否就我範圍再行酌奪奏

聞嗣經協辦嘉定等處尙爲出力亦據實陳奏偶來臣營謁見每爲切實勸導方冀曲意籠絡俾爲我用不料其跋扈狂悖竟至於此自何伯回國後英國駐滬提督領事繙譯各官均與白齊文交

往親密白齊文亦恃有英國袒護日漸肆橫此次逞兇滋事經吳  
煦楊坊知照英國陸路提督士迪佛立與之理論士提督麥領事  
方以爲非邀至臣營晤商據士迪佛立麥華陀面稱已遵臣照會  
轉飭白齊文即日解去兵柄聽候中國查辦一面諭令英國前派  
去幫同教練之兵官名奧倫者暫行接管俟中外會商派定委員  
接替辦理臣聞奧倫性情偏執未可專任且疊奉

寄諭令派大員接管自應欽遵妥辦惟常勝軍人數過眾犷悍難  
制其帶兵弁目百數十人皆係外國人與該勇相習已久若管帶  
驟易生手呼應難靈轉生事端而各弁目素畏英國之強內又有  
英國派去數人又當白齊文反噬之際非英國派人暫管不能令  
行禁止萬不得已與士迪佛立等酌商由中國與英國各派委員  
會同接管並議定外國所派之員須與中國官員和衷會商聽臣

調遣其支發口糧約束營規裁減勇數一切章程應由中國主持  
經理該兵官不得干預並由臣照會士提督遵照辦理查升用副  
將署提中營參將李恆嵩與常勝軍相處最久人頗機警明白大  
義前經臣等派令協同管束奏奉

諭旨李恆嵩如與該勇熟習足以獨力鈐制密行稟候李鴻章酌  
辦等因欽此臣因剖委該員會同英國所派兵官接管俟收回兵  
勇再飭陸續裁汰至三品頂戴白齊文既隸中國版圖違犯法令  
應照中國之法治罪以杜後患而儆其餘業令吳煦楊坊李恆嵩  
等嚴密拏解應由總理衙門照會美國公使轉飭駐滬領事官  
一體嚴拏勿任遠颺仰乞

聖明核示至二品頂戴蘇松太道吳煦二品頂戴前蘇松糧道楊  
坊本願帶常勝軍赴援金陵屢次延誤實由白齊文不遵調遣楊

坊並被白齊文毆傷尙非縱容逗留然該道等創募此軍及換入接帶始終主謀又有督帶之責不能實力鈐制辦理不善咎亦難辭應請

旨將吳煦楊坊暫行革職仍令妥籌接辦事宜以觀後效如該軍仍前曠悍應責成吳煦楊坊妥爲裁遣一手經理不得置身事外希圖諉卸再前次擬赴金陵雇用輪船及添購軍火價值頗鉅茲既赴援不成此項銀兩不准開銷稅款應令吳煦楊坊自行賠補除俟辦有頭緒再行具奏外所有常勝軍不遵調度及籌商撤換各緣由理合會同頭品頂戴辦理通商事務大臣臣薛煥附片馳陳伏乞

聖鑒訓示謹

奏

奏獎外國官弁片

同治元年十一月十八日

再欽奉九月二十五日

上諭李鴻章奏中外官軍克復嘉定縣城乘勝擊退援賊一摺此次英國提督何伯與李鴻章謀定後動將士輯睦崇朝而下堅城法國官兵亦奮勇爭先出力勦賊均克盡友邦之誼著李鴻章傳旨嘉獎等因欽此

臣當即欽遵傳

旨嘉獎該兩國官弁等莫不歡欣鼓舞感激

恩施以爲榮寵惟查自中外會防以來英國領事麥華陀法國領事伊擔不分畛域遇事籌商曾經勸諭洋行捐造礮臺開築濠牆工程浩大辦理迅速其兩國會勦之兵弁房屋夫船供應一切費用雖由中國籌備而西兵糧餉皆係該國自行給發英國水師提督何伯陸路提督士迪佛立繙譯官阿查里法國水師提督伏恭

等奮勇爭先不辭艱險疊次助剿克復堅城竊惟中國出力員弁皆職分應爲之事我

國家酬庸有典猶且細大不遺矧在遠國外臣視同己事摧堅陷陳卓著戰功酌理衡情似難沒其勞績可否懇

恩飭下總理各國事務衙門照會兩國駐京公使回奏該國酌給議敘以示我

朝行賞論功中外一體之至意其餘兩國出力員弁卽由臣飭令會防局仿照該國功牌式樣另鑄金銀等牌若干面分別酌給佩帶宣布

皇仁俾知感奮臣爲柔遠旌功起見是否有當伏乞

皇上聖鑒訓示謹會同頭品頂戴辦理通商大臣臣薛煥附片具奏

收復常熟昭文攻克福山許浦摺

同治元年十二月初十日

奏爲密約投誠收復常熟昭文縣城攻克福山許浦各海口并官

軍攻燬太倉附城賊壘力籌堵剿情形恭摺馳陳仰祈

聖鑒事竊臣前以逆眾分守崑太兵單尙難進取俟機有可乘再

圖攻剿緣由於十一月十八日馳

奏在案適據管帶親兵水師游擊周興隆稟稱偽天軍朝將錢桂

仁暨偽職駱國忠董正勤等由常熟專人來營諄求自願投誠獻

城并約太倉僞佐將錢壽仁卽周壽昌同時舉事臣與李鶴章密

商卽飭傳諭該僞職等約期內應并察知永昌練首候選道徐佩

璦與該僞職等合謀已久札飭調齊練勇協力妥辦嗣經周興隆

遵飭改裝入城密訂於十二月初一日常昭舉事卽約會官兵分

攻太倉與錢壽仁相應以期同日得手水陸布置均定昨據周興



隆駱國忠等稟稱僞忠王李秀成忽於十一月二十二日由金陵回至蘇州錢桂仁心生畏憚已託詞往蘇恐有反覆不及待初一日之期商定先期在常昭舉發遂於二十八日黃昏駱國忠設計演戲就席砍殺僞憑天安錢嘉仁僞逮天福姚得時卽率所部圍勦各館逆眾時董正勤等各誘殺諸鉅酋合兵夜搜梗頑賊眾殺之幾盡天明周興隆駱國忠督令合城雜髮挑派奮勇萬人分守四門及水陸來路以防蘇賊並令余拔羣潘金旺率礮船陸隊潛會福山僞職胡經元江勝海等合勦廣逆比至則賊營固守賊艇環列無隙可乘周興隆駱國忠於二十九日率奮勇千人洋鎗二百名夜四鼓進抵福山令潘金旺駱國孝仍攻賊之南周興隆駱國忠抄過北面斷賊登舟之路并伏百人於江口隄下天色將曙鎗礮噴筒齊聲雷發余拔羣亦於江中開礮攻打自辰至午賊漸

不支僞主將粵逆侯得龍立於船頭方指揮聞駱國忠從岸下覘  
定手燃洋鎗正中侯得龍倒落江中賊船潰亂駱國忠揮兵齊發  
火箭燬逆艇數隻賊溺斃甚多余拔羣亦飛船衝突奪賊船二隻  
其餘竄逸大江西北者十數船僞近天福謝有成慌張欲走胡經  
元從背後殪之江勝海乘勝砍殺小頭目數十並率眾從內殺出  
時逆眾守牆者鎗礮子尙如雨下駱國孝跳越兩濠手刃悍逆數  
名毀牆而入潘金旺周興隆分從南北殺進粵逆死黨無一脫者  
並生擒五十餘人許浦白茅徐六涇各海口賊營皆爲我有此十  
一月二十八九日十二月初一日收復常熟昭文縣城並攻克福  
山要口之情形也贛南鎮總兵程學啟知縣李鶴章遵臣飭諭先  
於潯鎮鋪望仙橋等處派隊扼堵率綴崑賊自率親兵開字諸營  
直至太倉五里墩造浮橋渡河毀其卡進至南碼頭石橋亦爲賊

毀憑河立四營拒我程學啟等揮兵對敵卽時趕造木筏率驍勇渡河踏毀土營四座賊敗退入城我軍徧至城根河而甚闊不能全渡慮中賊計仍回對河嚴陣以待賊堅伏不出城中寂無動靜嚮晦之際風雪漫天士卒飢凍遂撤回外岡而是日周興隆所派之董正勛吳超凡帶勇千人前抵太倉支塘鎮伏賊突起鎗礮對擊鎮後又竄出一股斜包我軍之後截斷歸路董正勛等苦戰退回均受重傷陣亡勇丁二十餘名僞佐將錢壽仁在太倉知事機已洩旋率所部二千脫出初七日來上營投見暫安插其眾於黃渡是否可用仍須察看分別遣留此初一日進攻太倉獲勝未能如約會齊之原委也徐佩璣不知忠逆之回也先入蘇城將密有所約忠逆至蘇疑而拘之該團局船勇聞信則伺賊之援常昭者中路擊敗之賊復改道來援惟常昭新附眾心未定又爲蘇州門

戶忠賊必挾全力以相爭勢頗危險臣軍分守嘉定青浦各要隘中阻崑太兩城與常熟相隔甚遠陸路無從救應又未便以孤軍深入棄松滬於不顧但據周興隆略國忠稟報城內米糧頗足沿海一面尙可通行臣已用礮船解濟軍火飛調福山鎮總兵鞠耀乾率所部師船會同副將黃登第艇師五隻駛泊徐六涇口飭千總袁光政將周興隆所部船隻帶赴常熟互爲聲援並委候補知州吳毓芬前赴常昭福山一帶察看情形撫馭降眾固結其心如援賊暫未調齊城內不生他變周興隆等或可支持一兩月以待臣新軍之至先是六七月間臣疊派員弁赴皖北招募十營嗣因上游緊急曾國藩截留張樹聲等五營守蕪湖旋調守無爲州又留吳長慶等四營守廬江如皖事稍鬆明年正二月可以抵滬臣處兵力漸厚卽當相機進圖崑太以通常昭之氣如新軍未至以

前忠逆糾合上下游賊眾圍攻常昭必分股出崑山撲我前敵各營以圖牽制臣縱不能遠救常昭亦當會合中外各軍竭力堵剿以掣援賊之勢而此番常昭收復使該逆自相殘殺且使目前上竄大股各思回救無論能否久支於全局軍情或稍有裨游擊周興隆與降將駱國忠等於四面賊區之中奮勇舉事力誅賊酋黨眾多人收復城池復乘勢攻克福山要口將連年出江肆劫之廣逆誅戮殆盡實屬膽氣過人惟臣處兵力過單無法往救不知該游擊等能否保守未敢遽爲請獎應由臣酌核勞績暫假以虛銜軍功頂戴以資籠絡果其力卻援賊始終不渝再查明在事出力人員懇

恩優予獎勵所有先期密約收復常熟昭文縣城攻克福山各口並現籌堵剿各情形理合恭摺馳陳伏乞

皇上聖鑒訓示謹  
奏

整飭常勝軍片

同治元年十二月初十日

再白齊文不遵調遣劫餉毆官已經臣

奏明嚴密拏解並將片委參將李恆樹會同英國兵官奧倫管帶

常勝軍緣由附陳在案溯查常勝軍本華爾營部其初不過千人

吳煦楊坊等始意欲藉以禦寇薪糧夫價及一切軍火支應視官

軍加至數倍漫無限制陸續增至四千五百餘人并長夫礮船輪

船經費月需餉銀七八萬兩前此收復松江青浦等城未嘗不兼

資其力遂日益驕蹇漸成尾大不掉之勢臣籌思累月久欲稍加

裁抑而事關中外交涉之端未便輕於發難此次白齊文逞兇跋

扈立即撤其兵權事當更替之初須求補救之法英國提督士迪

佛立初不願中國官員會帶臣與之往復辯論舌敝唇焦數日以

來始獲定議士迪佛立原定條約十三條臣覆加勘正增爲十六

條於十一月二十五日蓋印移交分執並咨明總理衙門備案其  
條約大要如裁汰常勝軍爲三千人減定長夫額數口糧刪除病  
房及日用房費種種浮濫之款既可以稍節餉需又如中國派員  
會帶口糧由臣處派員經管眼同外國官散放松城內外地方事  
宜外國管帶官不得干預購買軍火須有撫臣文書管帶官不准  
私購懲辦諸勇須聽中國會帶官主意各條亦可以漸收兵柄自  
此次定約庶以後辦理稍有頭緒至於白齊文逃匿不出據吳煦  
等稟稱該犯經士提督派兵官押解來滬現由英國兵船看管至  
今並未交出係藉口華爾白齊文先後託買軍火帳未算清等語  
復據英國領事請由臣處派員赴兵船會算帳目臣查常勝軍先  
前經用款項從未稟報臣衙門並無案據未便會算代償當卽札  
飭吳煦楊坊自行清理相應請



旨將三品頂戴白齊文先行革去職銜仍俟英國交出該犯並責令吳煦楊坊等解臣營照中國軍法懲辦其常勝軍先經議派英兵官奧倫會帶茲據英國定約隨後奏明交兵官戈登管帶該二人者臣均未悉其底蘊現在奧倫甫經接帶會同吳煦李恆嵩赴松點驗勇數裁減冗費粗立章程似尙實心幫助將來能否持久有無偏執私見不致再生枝節之處容臣隨時察酌妥辦具奏臣惟諄飭吳煦核實整頓和衷籌商於調停籠絡之中仍寓裁制控馭之道以期協力保衛仰副

聖座所有籌議整飭常勝軍各緣由謹會同頭品頂戴辦理通商大臣臣薛煥附片具陳伏乞

聖鑒訓示謹

奏

查明淮鹽課釐數目摺

同治元年十二月初十日

奏爲遵

旨查明兩淮鹽課及江北鹽釐各數恭摺覆陳仰祈

聖鑒事竊直接管卷內咸豐十一年十一月二十一日奉

上諭兩淮鹽課現飭喬松年專心辦理自應日有起色每月可得

課銀若干江北釐捐爲數若干並著該撫查明具奏等因欽此當

經前撫臣欽遵飭查臣復飭令分晰詳覆在案茲據該運司詳稱

淮南鹽課自咸豐七年奏明設局徵收每年所收課銀總在二十

萬兩內外現在鹽課收數雖與歷年相仿加以新增鹽釐銀錢合

算收數實倍於前其鹽釐取諸水販者在於外江抽收取諸棧商

者在於內河抽收均歸該司督率局員按月徵解惟所收課釐因

銷數暢滯靡常多寡不一未能逐日派定數目現以一年所入約

署攤計每月可得鹽課銀一萬數千兩鹽釐銀一萬數千兩鹽釐  
錢一萬一二千串其每月解往臨淮大營在萬兩之內江北糧臺  
在萬兩以外解瓜洲水營與鎮江陸營自七八千至萬兩不等兩  
營相同又解臨淮大營清淮籌防及南北兩臺釐錢均在三四千  
串內外礮船勇糧在一千串內外俱係隨時分別解濟軍餉並開  
具簡明清摺詳請覆

奏前來臣查金陵被踞以後江路梗阻商販不前卽竭力徵收斷  
不能還復課額而設卡抽釐以補正課之不足果能滴滴歸公軍  
餉不無裨助該運司所報每月入款似已漸有起色除飭令督率  
各員設法運銷嚴剔奸弊以冀課釐兩項日益月增謹照繕清單  
恭呈

御覽所有遵

曾查明淮南鹽課鹽釐各數緣由謹會同協辦大學士兩江督臣  
曾國藩署漕臣吳棠恭摺具陳伏乞  
皇上聖鑒謹  
奏

勒伯勒東陣亡請卹摺

同治元年十二月十七日

奏爲權授浙江總兵勒伯勒東礮傷陣亡請

旨優卹並派員接帶該軍恭摺奏祈

聖鑒事竊據浙江甯紹台道史致謬稟稱已革道員張景渠署總  
兵勒伯勒東帶兵由上虞分道進剿籌攻紹興十一月二十六日  
我軍在大小皋埠接仗獲勝二十七日紹城諸暨之賊分股竄至  
東關曹娥江道墟包抄我軍之後希圖偷渡直犯上虞時勒伯勒  
東已帶隊先行至竹箦牌紮營距紹城十餘里張景渠聞後路賊  
犯曹娥帶兵回援並分撥州同謝國恩信義軍由平水迎剿張景  
渠督同游擊布興有守備張其光等將曹娥之賊擊退惟游擊李  
光一軍在道墟接仗失利賊已蔓延嵩壩將及梁湖情形萬分喫  
緊張景渠分兵力堵後路二十八日勒伯勒東拔隊徑薄紹郡昌

安門鎗礮互轟斃賊不少勒伯勒東親放大礮藥多礮炸致傷該  
總兵頭頂登時殞命並傷亡外國兵頭范夫哈格齡二員洋兵密  
梢爾密蓋爾二名各勇陣亡傷亡三十餘人緇譯官布樂師及兵  
勇二十餘人受傷甚重實屬變生意外幸該逆未敢出犯勒伯勒  
東所部仍退駐竹節牌十二月初一日賊股來撲經兵頭法蘭喀  
揮兵奮擊鎗斃騎馬賊目一名殺賊六七百名餘賊逃竄入城該  
營與信義軍仍退紮潭村鎮塘一帶該道現擬置江扼守相機再  
進並派人將勒伯勒東遺軀迎護來甯厚葬郊外聲請  
奏卹前來臣等查勒伯勒東本係法國兵官本年夏秋間助剿甯  
波慈谿餘姚等處無不勇往直前城池立復自權受中國總兵職  
任以來感沐

聖朝恩寵益加奮勉攻克上虞茲以急取紹城孤軍深入親然巨

礮臨陣傷亡實屬奮不顧身效忠盡命允爲荒服盡臣可敬可憫相應請

旨照故副將華爾之例

敕部從優議卹並兵頭范夫哈格齡二員一併議卹以慰忠魂法國提督伏恭現派達耳第福由上海馳赴甯波接統勒伯勒東舊部兵勇面請臣鴻章就近劄委其在甯波之英法兵官噶藥德克等亦力薦之臣查達耳第福卽買忒勒前在餘姚帶勇打仗尙稱勇敢惟貪利任性實不及勒伯勒東之誠厚前總理衙門以法國公使哥士奇請加該員以江蘇官職咨令臣鴻章酌辦臣方給以江蘇副將劄付卽將前派法國教練之洋鎗勇五百名交其管帶疊加訓飭似尙勉就範圍茲法提督請派赴甯接帶情事尙願臣欲其幫同地方官和衷出力謹受甯波道節制是以未遽允給委

札昨甯波道史致謬稟稱該軍無主勢恐渙散請卽奏明暫令達耳第福接管英國總兵呿藥德克由甯來滬謁晤復以相屬臣鴻章稔知達耳第福素性剛愎又面囑呿藥德克隨時照料並諭令達耳第福須聽甯波道調遣不准擅專妄爲致干軍紀如果該員實力報效恪遵中國法度再由甯波道詳請

奏懇

聖恩授以浙江武官職任並由臣宗棠核給劄付如達耳第福有貪利滋擾及督隊不力情事卽由臣等一面撤革一面奏

聞所有權授浙江總兵勒伯勒東傷亡並暫委達耳第福接帶各緣由謹會同通商大臣臣薛煥專摺馳陳是否有當伏乞

皇上聖鑒訓示謹

奏



請留英總兵哇藥德克片

同治元年十二月十七日

再據甯紹台道史致謬稟稱據甯波紳士翰林院編修孫學嗣等聯銜呈稱甯波各屬自上冬逆匪竄擾生民塗炭本年四月前道張景渠帶領兵團由鎮海乘勝進攻約會英法二國水師同時助剿迅將郡城克復慈谿奉化象山三邑以次肅清七月攻克餘姚八月慈奉復陷逆氛逼近郡南當蒙飛調兵團與英國總兵哇藥德克法國稅務司日意格籌商防剿水陸進兵慈奉接踵攻復郡城解嚴嗣又拔取上虞收復新嵎哇總兵無役不與所向有功中外同心和衷共濟地方賴以安堵商賈因之漸通且自該總兵駐紮以來約束洋兵相安無事不分畛域督隊巡查尤爲商民所感頌茲聞有不日調換之信聞郡紳民羣相走告依戀難忘呈懇詳請具

奏將哇藥德克展留一二年俟全浙廓清再行遷調等情由該道轉稟前來臣等查英國水師總兵哇藥德克深知大體疊次助攻城池無恃功驕矜之習所部兵目遇敵爭先毫無騷擾該道史致謬現請管帶常安軍教習洋鎗可冀練成勁旅實於海疆防務有益該總兵昨因公來滬臣鴻章接見其人尙屬和平公正孫學馴等以中華紳士請留外國兵官出於至誠非尋常保留地方官可比臣等未敢擅便可否請旨敕下總理各國事務衙門酌核照會英國公使將哇藥德克暫留甯波協防俟軍務稍平再令回國以資熟手而順輿情理合會同通商大臣臣薛煥附片具陳伏乞  
聖鑒訓示謹  
奏

請優卹曾貞幹摺

同治元年十二月十七日

奏爲卽用知府曾貞幹在金陵營次積勞病故請

旨格外加恩賜卹恭摺奏祈

聖鑒事竊據藩司曾國荃稟稱胞弟曾貞幹於咸豐三年以諸生  
隨兄曾國藩募勇三百人擊賊常甯之洋崗旋會水陸各軍東下  
自岳州假歸咸豐八年因兄曾國華殉難三河慨然有殺賊復仇  
之志前湖北巡撫胡林翼札委募湘勇千人赴鄂防剿十年克復  
太湖縣城經湖廣督臣官文奏保訓導并加國子監學正銜嗣圍  
攻安慶漸次統帶至五千人屢次擊救援賊克復安慶省城奉  
旨以同知直隸州選用時安慶初復江北各城多爲賊據該員駐  
守樅陽鎮以固皖東門戶同治元年隨曾國荃大營肅清江北各  
城渡江紮營三山夾會賊赴援青陽數萬人環攻三山營壘該員

以一軍力戰支持卒解賊圍遂進克繁昌縣城又會水師克復魯港南陵奉

旨賞給迅勇巴圖魯名號又進克蕪湖縣城遂圍金陵該員獨當江東橋一路七八月閒病瘧醫治甫愈適忠逆李秀成侍逆李世賢率賊數十萬赴援金陵時曾國荃駐雨花臺當金陵東路該員常西路力保餉道兼援東路之急苦守力戰四十餘日十月初五日擊退大股援賊奉

旨加恩以知府用初八日該員與福建提督楊岳斌察看九洲賊壘設法進攻感受風寒舊疾復發以十一月十八日卒於江東橋營次等情前來臣查補用知府曾貞幹素負奇氣爲諸生時專研學刺起距之法有幽并俠骨自曾國藩奉命督辦軍務曾國華曾國荃皆從事行間該員以諸兄受

國厚恩感激圖報益習爲勞苦忍飢寒隆冬短絛衷和不御棉衣  
初帶勇三百人楊岳斌彭玉麟皆其幫辦該員知爲大將才力言  
於曾國藩使各將一軍論者服其知人治軍有紀律尤善拊循戰  
士人樂爲之用履危蹈險堅固不搖忠侍大股赴援金陵屢爭奪  
官軍餉道該員從容布署戰守兼施晝夜防護無少休息使賊卒  
不得逞以去先後克復安慶蕪湖各城及解金陵賊圍實該員之  
力居多而在軍中日久勞苦憂思該員精氣亦已竭矣又逆揣金  
陵之賊勢必北渡解圍四日卽與楊岳斌冒風雨乘舟上下謀攻  
九洲洲以遏竄路屢接曾國藩稟報敘述該員戰績徒以曾國藩  
親弟未敢聲請獎敘臣欲專摺保奏又念曾國藩公忠之誼不欲  
爲諸弟敘勞乞

恩實出至誠若由

臣具奏亦涉形迹之私欲俟克復金陵後彙案

敘保而還一病不起於臣心尤爲遺惻該員年甫踰三十並無親生子嗣初謀帶勇時先撫兄子紀渠爲子本年五月其妻鄧氏又已病故聞其病中譖語但以殺賊守濠爲言忘家爲

國至性耿耿斬然無所顧念尤爲難得伏查曾國藩兄弟五人爲國家效力疆場先後死事者二人一門忠義海內欽仰從前候選同知曾國華殉難三河經胡林翼奏請

加恩賜諡以其勞績宣付史館茲曾以幹在軍營病故其生前功績之盛與所以積勞致疾之由迥非尋常將士可比臣知之較深不敢任其湮沒可否仰邀

諭旨准照二品例賜卹並予

賜諡於本籍及死事地方建立專祠仍宣付史館特予立傳出口逾格天恩所有曾貞幹在營病故請

自優卹緣由謹繕摺具奏伏乞  
皇上聖鑒訓示謹  
奏

覆奏添募揚勇片

同治元年十二月二十七日

再欽奉十二月初十日

寄諭李鴻章招募揚勇原因滬上兵力未厚第江北各營月餉僅止三兩且須五六十日始能一關必致該處得力之勇改名應募相率引去於江北軍務大有關係著李鴻章飭知委員張家珩等卽行停止該撫籍隸皖北廬鳳一帶民風素稱强悍若派員前往招募必可訓練成軍並著酌量辦理上海月餉雖多何以每名有七八兩至十兩十二兩之多恐有常勝軍潛赴江北招募之事尤當嚴行禁止等因欽此伏查臣處各營兵勇皆照曾國藩楚軍章程每月給銀四兩二錢五錢不等無論餉源盈絀臣恪守定章斷不敢妄有更變近因稅釐短收不得已而酌發半餉代購食米滬上薪糧昂貴數倍江北兵勇之苦奚減揚營且以江北各屬完善



之區供給揚州一軍以上海一隅稅捐所入供給臣軍與各國教練之勇並分濟鎮江安慶各軍其餉數之多寡亦可懸揣而得矣至所稱月領口糧銀七八兩至十兩十二兩者外國教練勇目頗有此數從前徇洋人之請相沿成例習爲固然臣方日議裁減豈肯令所部各營尤而效之壞亂營制虛費帑項

聖明慮及常勝軍過江招募固知臣軍無此餉額臣亦無庸深辨惟目下防剿喫緊兵力單薄以致欲取崑太則分路並進而不足欲援常昭則臨時抽調而無從疊次奏明在案前派員赴皖北募成十營經曾國藩截留九營分守無爲廬江等處故就近派赴淮揚添募以濟孤軍之急仍嚴飭該員弁不准收募揚營兵勇旋據募回五營臣親加點驗均係裹下河上舊與皖北客民於揚營防務似無關礙常勝軍亦無潛赴江北招募之事昨准都興阿來咨

卽經詳晰咨復而都興阿疑慮過甚遽以上瀆

宸聽仰煩

聖訓周詳莫名欽悚除飭知張家瑜停止招募外所有查明各緣  
由理合附片覆陳伏乞

聖鑒謹

奏

李文忠公奏稿卷二